

續  
文  
獻  
通  
考

續文獻通考卷之六十四

皇明進士雲間王圻纂輯

節義考 忠臣三

遼

阿果達爲遼輦帳詳穩酌古爲客省使高清明爲勃海詳  
穩海里爲天雲軍詳穩聖宗開泰中同蕭排押等與高  
麗戰於茶陀二河遼兵失利阿果達等皆死之

撻烈哥爲國舅詳穩蕭打里爲官使聖宗統和四年與宋  
戰于莫州皆死之

撻不野爲北路招討使道宗大安九年西北夷磨古斯僞  
降旣而乘虛來襲撻不野死之

金

胡沙虎完顏部人太祖時從軍爲詐降人高永昌所執神色自若罵永昌曰汝叛君逆天今日殺我明日及汝矣罵不絕口死贈遙領節度使

特虎雅撻瀾水人太祖時從軍以死捍遼兵没于陣皇統間贈明威將軍

粘割韓奴皇統中以仗義將軍護衛招耶律大石降大石憤其不下馬且挾使跪韓奴不屈而死世宗贈昭義大將軍

曹珪徐州人大定四年州人江志作亂珪子弼在賊黨中珪謀誅志并弼殺之詔以大義滅親進一官正班用之

溫迪罕蒲覲爲兀者群牧使被賊執欲其同反曰吾世受國恩子姪皆仕宦不能從汝而累吾族也賊鬻之子孫皆被害

鶴壽鄆王昂子五院部人老和尚率衆招鶴壽同反不從遂與二子俱見殺

訛里也契丹人大定初招諭契丹窩幹不屈節死褒贈納蘭綽赤咸平路猛安人不從契丹括里招後被執鬻殺之褒贈

魏全壽州人泰和六年爲宋將李真所執至死罵不絕口鄩陽宗室子爲符寶祗候至寧元年爲亂臣紇石烈執中所害贈宣武將軍順天軍節度副使

夾谷守中咸平人至寧末爲彰德軍節度使城陷爲下人所執欲其招降平涼守中僞許之至城反其辭交刃殺之贈資善大夫東京留守

王晦高平人有將帥才明昌初累官翰林學士勸農使順州受兵其故部曲王臻者欲說之降晦不從竟就死加贈其官命有司立碑歲致祭焉

石稊元毅咸平路人明昌中官彰德府治中奮力禦敵而死贈武信將軍

伯德梅和尚秦州人正隆時爲崇義軍節度使與敵拒戰而死贈龍虎衛上將軍

烏古孫兀屯上京路入貞祐中以元帥左監軍留守北京

後以兵入衛中都守定興軍敗而死

高守約字從簡遼陽人宣宗時爲觀州刺史元兵徇河朔不屈而死贈崇義軍節度使謚忠敬

和速嘉安禮字子敬大名路人宣宗時爲泰安州刺史被元兵執或以酒監對安禮曰我刺史何諱爲使跪不屈以戈撞其胷殺之贈泰定軍節度使謚堅貞

王維翰字之翰利州龍山人宣宗時爲定海軍節度使結營自守力窮被執不降死妻姚氏亦同死贈中奉大夫姚氏芮國夫人謚貞潔

移刺古與涅宣宗時爲安化軍節度使與元兵力戰流矢連中其頰拔去復中其頰死贈安遠大將軍

宋辰宛平人宣宗時爲沁南軍節度使元兵至懷州城破  
死之

王祿爲泗州新城提控宣宗時宋人襲泗州祿死之

水甲法心宣宗時守密雲家屬在薊州者爲元兵所得示  
以不降則盡殺法心不顧城破而死贈開府儀同三司  
樞密副使封宿國公同死者咬查刺亂舍十方奴皆贈  
官仍命樹碑以時致祭

高錫字永之宣宗時爲河北東路按察轉運使城破自投  
城下而死

吳僧哥西南路部落人宣宗時以同知太原府事死于元  
兵贈鎮國上將軍順義軍節度使

蒲魯虎宣宗時爲陝州宣撫使元兵取潼關戍卒皆潰蒲魯虎獨禦戰兵敗死之

完顏訛可爲同州節度使宣宗與定時元兵取同州訛可死之

合納蒲刺都守潞州與定中元兵攻潞州刺都力戰死之  
贈御史大夫

烏古論德升益都人宣宗時以河東元帥不能完城自縊死其姑及妻皆自殺贈翰林學士承旨以奉御俸養其幼子兀里偉

張順淄州士伍宣宗時元兵圍淄州行省提控王庭玉將兵救之使順往覘爲所執使宣言行省兵敗宜速降順



伴許之至則反其辭臨死曰得爲忠孝鬼足矣贈宣武將軍同知棣州防禦使事有司給養其親任用其子孫郭斌會州將也元兵圍會州城斌驅妻子入一室焚之已而自投火中死

馬驥禹城人宣宗時爲濟陰令爲元兵所執求金曰吾書生何從得是又使跪曰吾膝不能屈欲殺卽殺得爲大金鬼足矣遂死贈朝列大夫恭定軍節度副使

伯德窠哥奚人宣宗時以末勝軍節度使死于元軍

與屯醜和尚宣宗時以代州經畧使被元兵執不屈死

完顏六斤中都人宣宗時以元帥右監軍守潞州與元人力戰而死贈御史大夫

女奚烈幹出宣宗時仕至植州刺史元兵至曰吾曹坐食官祿可忘國家恩乎誓力戰而死爲張提控所害

時茂先密州人紅襖賊據密州時過茂先所居村居民相率迎之茂先獨罵不迎賊執而殺之至死罵不絕詔贈武節將軍同知沂州防禦使

溫廸罕者兒爲同知上京留守事蒲鮮萬奴攻上京其子鉄哥生獲老兒脅之使降不從鉄哥怒亂斫而死贈龍虎衛上將軍婆速兵馬都總管

梁持勝字經甫宣宗時以保大軍節度使守鄜州城破自投崖下死贈特進知延安府事

紇石烈鶴壽河北西路人宣宗時行元帥府于鄜州城破

猶據土山力戰而死謚果勇

蒲察裏室東北路人宣宗時以孟州防禦使救鄜州死之  
贈資德大夫定國軍節度謚襄勇

任福爲沔城縣軍官宣宗時元兵下沔城福死之

馬甫爲潞州都統宣宗時元兵攻潞州甫死之

劉仲亨爲錦州元帥宣宗時元兵徇錦州仲亨死之

汝奚烈資祿咸平府人宣宗時以金安軍節度使救鄜州

被執不降死贈銀青榮祿大夫中京留守復錄其子

完顏訛出虎爲汾州節度使宣宗時元兵徇汾州訛出虎

死之

郭用爲平陽提控宣宗時元兵攻平陽用死之

李革及從坦知平陽府事權參知政事行尚書省宣宗時元兵下平陽革及從坦死之

納合蒲刺爲潞州元帥右監軍王良臣爲都叅議官脩起居注宣宗時元兵收潞州蒲刺及良臣死之

趙益太原人宣宗時爲太原同知城將破焚其府庫殺妻子投其符印于井遂自殺贈銀青榮祿大夫河東北路宣撫使求其子孫錄用

侯小叔河東縣人宣宗時以權元帥左都監守河中凡言降者皆斬之有表兄張先諷以保妻子侯卽縛先于柱而殺之後城破而死下詔褒贈

郭秀爲武州軍事判官宣宗時元兵下武州秀死之

喬天翼爲合河縣令宣宗時元兵下合河天翼死之

烏古論仲溫爲鎮西軍節度使宣宗時元兵下嵐州仲溫死之

王佐字輔之霍州人宣宗時主沁州玉女寨救襄垣中流矢卒贈金吾衛上將軍

黃摑九住臨潢人宣宗時知彰德府元兵至戰沒贈榮祿大夫南京留守仍錄用其子孫

王毅大興人以經義進士累官至東明令貞祐末東圍急毅率民兵願戰者數百人拒守城破率衆抗戰力窮被執縣人王八欲降之毅厲聲曰忠臣不佐二主驅殺者以刀斫其頸不屈而死

烏林荅乞住大名人宣宗時以元帥右都監援中都戰沒  
贈榮祿大夫參知政事以參政半俸給其家

陀滿斜烈咸平路人宣宗時知彰德府事城破死之

高霖東平人官兵部尚書參知政事中都留守兵亂死之

謚文簡

高憲遼東人爲德州防禦判官遼陽城破死丁兵

粘葛貞宣宗興定二年權元帥守晉安城破貞與府官十  
餘人皆死之

徒卑航宣宗時爲安州刺史元兵大至謂民曰我家兩世  
駙馬受國恩不可降民曰太守不屈我輩願同死守及  
城將危航先繼其妻孥謂家人曰我死卽撤屋焚之遂

自縊民同死者甚衆

完顏陳和尚名彞字良佐宣州人宣宗時以忠孝軍統領  
戰于三峯山敗走鈞州城破殺掠稍定乃出自言曰我  
忠孝軍陳和尚也我死亂軍中人將謂我負國家今日  
明白死時欲其降斫足頸折不屈割口吻至耳喋血而  
呼至死不絕大將養之酌以馬潼祝曰好男子他日再  
生當令我得之贈鎮南軍節度使塑像褒忠廟勒石紀  
其忠烈

伯德爲東勝州節度使宣宗時元兵徇東勝伯德不屈死  
之

移刺阿里合爲霍州刺史宣宗時元兵下好義堡阿里合

死之

楊沃衍朔州人爲北邊屯田小吏後守鈞州元兵使人誘降沃衍拔刀斫之曰我起身微賤蒙國大恩汝欲以此污我耶遂語部曲後事望汴京再拜且哭曰無面目見朝廷惟一死耳卽自縊從死者十餘人

楊敏中淄州人故致仕屯留主簿宣宗時元兵取淄州與判官齊鷹揚郡民張乞驢等募兵備禦城陷率衆巷戰鷹揚戰死敏中乞驢被執不屈而死贈敏中同知橫海軍節度使乞驢同知淄州軍事

完顏承輝宗室也宣宗貞祐元年爲右丞相都元帥元人圍燕京承輝與林撚盡忠期同死社稷盡忠不從承輝



乃辭家廟召左右司郎中趙思文謂之曰事勢至此惟  
有一死報國耳乃盡出財物給散家人仰藥死

與哥鳳翔人起于群盜人呼曰熱劉後于清化戰死元兵  
酌酒以吊西州耆老語之至爲泣下

烏古論黑漢以親軍入仕爲唐鄆元帥府把軍官哀宗時  
元兵攻急城中糧盡人相食黑漢殺其愛妾啖士士爭  
殺其妻子黑漢守益堅後爲宋軍所獲脅使降不屈死  
馬慶祥字瑞寧澤州人宣宗時守鳳翔命盡工肖其像付  
家人出城外殊死戰矢盡元兵圍之數匝欲降之竟不  
屈而死贈輔國上將軍恒州刺史謚忠愍凡同死者十  
有三人哀宗爲立褒忠廟仍錄其孤

陀滿胡士門字子秀策論進士也哀宗正大三年爲臨洮府總管城破被執誘之降不願使之跪不從以刀亂斫其膝頸終不屈遂殺之贈中京留守立像褒忠廟仍錄用其子孫

完顏愛申爲順德節度使哀宗正大四年元取順德愛申死之

草火訛可爲權簽樞密院事正大八年元取河中府訛可死之

姬汝作字欽之汝陽人哀宗時守汝州力戰而死

馬肩龍字舜臣宛平人哀宗時同守汝州晝夜二十戰力盡乃已肩龍以劔自剄詔各贈官配食褒忠廟

禹顯雁門人哀宗時權元帥府都監守襄垣軍內變城破  
被擒帥不忍加害既而密遁去將往從上黨公軍復爲  
追兵所執不屈死

張邦憲秦州人正大中進士爲永固令天興二年避兵徐  
州被亂兵卓翼所執將驅之北罵曰我進士也朝廷用  
爲邑長可從汝曹反耶遂遇害

商衡字平叔曹州人哀宗時爲秦藍總帥府經歷官爲元  
兵所得欲降之不屈望闕瞻拜曰主將無狀亡兵失利  
臣之罪責亦無所逃但以一死報國耳遂引佩刀自剄  
木甲脫魯灰上京人哀宗時以元帥屯商州大吉口將潼  
關兵入援至商山遇雪元兵邀擊之士卒凍餒不戰而

潰脫魯灰被執不屈拔佩刀自刎

吳邦傑登州判官也爲元兵所得驅令攻城邦傑曰吾荷國恩詎忍攻吾君之城與之酒食不顧乃被殺

楊達夫字晉卿三原人嘗以進士主鄜縣簿事家居金末詔徙入關爲元游騎所執將褫衣害之達夫大言曰我金國臣子旣爲汝所執不過一死忍袒裸以贖天日耶遂見殺兩山潛伏之民皆曰如此好官他日祠之當作我橫山之神

烏林荅咬住爲防禦使哀宗時元兵薄鄭州咬住死之

慶山奴守許州哀宗時許州兵變降元慶山奴死之

張若遇攝臨須令哀宗時元兵徇臨須若遇死之

馮延登字子俊吉州人哀宗時以翰林學士奉國書至金  
金欲誘鳳翔帥不從再三迫誘以刀截去其鬚髯岸然  
不動乃監之豐州後放還權刑部尚書元兵下汴京欲  
擁之北行延登躍城旁井中死

烏古論仲端字子正哀宗時留守汴京數言人死亦易事  
以燕之春來秋去爲比書諭裴滿思忠既畢連飲數杯  
遂思忠出門曰此別終天矣卽自經其妻亦從死明日  
崔立以城降

烏古孫奴中字道遠由譯史入官哀宗時以行省左右司  
郎中兼知官省事留汴京居守崔立作變明日同御史  
大夫裴滿阿虎帶自縊于臺中時同死者戶部尚書完

顏珠顥奉御完顏忙哥大睦親府事吾古孫端大理裴  
滿德輝左副點檢完顏阿撒右副點檢溫敦阿里參政  
完顏奴申之子麻因左右司員外郎聶天驥

完顏褚兒都喜爲元帥哀宗時元擊大河南岸都喜死之  
滿察琦字仁卿陽信人哀宗立講議所受陳言文字琦以  
安平都尉與焉崔立變後令改易巾髻琦謂元好問今  
日易巾髻在京人皆可琦獨不可琦一刑部譯史襲先  
兄世爵安忍作此今以一死付公然死則卽死付公一  
言亦剝矣其母夢三人潛伏梁間驚寤琦曰兒意在懸  
梁此鬼已先見母夢母曰兒所處是也卽自縊

蘇椿大名人以元帥守許州元兵至使招降椿卽斬之旣

而城陷不屈被殺

完顏撒合輦爲中京留守哀宗開興元年元圍洛陽撒合輦赴水死

完顏賽不花爲行省右丞相天興二年徐州降于元賽不花死之

強伸爲中都留守天興初元兵取洛陽伸死之

蔡八兒不知所始哀宗未爲忠孝軍元帥哀宗禪位承麟群臣人賀八兒不拜謂所親曰事至于此有死而已安能更事一君遂戰死

毛佺恩州人哀宗遷蔡以佺爲都尉城破自縊時同死事有滑州閻忠磁州郝乙河中王阿驢樊橋皆以職官戰

死

溫敦昌孫皇太后之姪哀宗居蔡以殿前左副點檢潛出城巡邏又潛取練江魚以供尚食與元人力戰而死

納坦胡失打前爲御史監察聞蔡州城破慟哭投水而死完顏忽斜虎爲尚書左丞哀宗天興三年孟珙入蔡州忽斜虎死之叅政李术魯小叟室等及軍士五百餘人皆從死焉

完顏絳山哀宗之奉御哀宗傳位承麟卽自縊于幽蘭軒絳山舉火焚之元兵入衆皆逃避絳山獨不去曰吾君終于是吾候火滅收瘞其骨耳兵笑曰汝命不能保能瘞而君耶絳山曰人各事其主吾君有天下十餘年身



死社稷忍使其遺骸暴露耶吾痊吾君之後雖寸斬不  
恨矣其帥奔盩厔奇男子聽之絳山乃以弊衾裹餘燼  
瘞汝水旁再拜號哭將赴汝水死軍士救之得免後不  
知所終

閻忠滑州人衛王時爲開州刺史賽哥叛忠單騎入城縛  
之出哀宗遷蔡與義軍招撫毛城等同日戰死

畢資倫縉山人守泗州爲宋人所執宋人賞其忠憤不梳  
欲全活之囚于鎮江府獄哀宗自縊宋人告資倫資倫  
嘆曰吾無望矣容我一祭吾君乃降耳宋人爲屠牛羊  
設祭鎮江南岸資倫祭畢伏地大哭投江而死

龔禹錫利州龍山人歸德受兵禹錫爲行院都事經畫守

禦一府倚重聞變或勸以微服免不從遇害

郭嘯蝦會州人哀宗時知鳳翔府守節不屈而死

王浩哀宗末爲扶溝令民錢大亨等執浩送款于元以有  
恩于民不忍加害遣所知勸之降終不聽於是殺之無  
血王簿劉坦尉宋乙並見害棄屍道傍自春徂夏獨浩  
屍儼然如生目且不瞑烏犬不敢近若有神護者

續文獻通考卷之六十四終

續文獻通考卷之六十五

皇明進士雲間王圻纂輯

節義考 忠臣四

元

李伯溫守賢之孫毅之子也元初知平陽府爲金兵所破伯溫拔劍殺家屬投井中以刃植柱刺心而死于守正爲河東路兵馬都元帥兼知平陽府後亦爲金所執不降置鐵籠中火炙死

石珪新泰人宋石守道裔元初爲山東諸路都元帥與金戰馬什被擒蒸殺於市其麾下立社交州祀焉

董俊藁城人金末歸元以功累官左副元帥後圍金王子

歸德力戰而死封壽國公謚忠烈

攸哈刺拔都渤海人元初守太原誓與城同存亡遂死于陣

任志潞州人元初統元帥金擒其長子如山招之志親射其子死志後死于武安次子存亦爲金將武仙所殺

耶律忒末契丹人元初以河北西路安撫使致仕居真定爲金將武仙所陷因誘其子天祐以趙州降當活汝父母忒末審令人語天祐曰毋以我故虧臣節天祐乃殊死戰仙怒盡殺忒末家十八人後天祐亦傷憊卒

伯八兒合丹氏太祖時爲萬戶討脫鐵木兒死焉其子八刺居脫鐵木兒左右謀報父仇力窮被執逼令跪不屈

以鐵搗碎其膝終不跪與弟奕不蘭同被害

合刺普華岳憐帖木兒子也世宗時爲廣東都轉運鹽使  
護征交趾餉道遇劇賊歐鍾等被執欲奉之爲王不屈  
而死贈戶部尚書守忠全節功臣謚忠愍

石天應興中人木華黎授以興中府尹從南征臨敵應變  
捷出如神以功累遷兵馬都元帥屯河中金兵來攻天  
應力戰死之

綦公直樂安人爲益都勸農官世祖召授領兵荆南等處  
招討使司事奉旨南伐有功後從伯顏戰洪水山追擊  
寢遠援兵不至公直與妻俱陷子瑗力戰而死

劉天孚字裕民大名人元世祖時知河中府爲叛臣阿思

罕兵至河中天孚極力拒守城陷被執斫河水開投水  
而死事聞贈官謚忠毅

李文爲權萬戶世祖中統三年蘄縣陷文與千戶張好古  
死之

呂義故東平權萬戶中統四年以義死王事賜謚貞節一  
闕文興至元中陳吊眼作亂攻漳州文興帥兵與戰死之  
妻王氏被掠義不受辱自投火中死元統二年事聞贈  
文興英毅侯妻王氏貞節夫人廟號雙節

鞏彥暉易州人代兄彥榮爲百夫長從攻宋次武昌大戰  
被傷度不免遂投水中敵援之載歸江州不屈而死

張懷德爲貴州知州成宗大德五年雲南土官宋隆濟反

攻貴州懷德與戰死之

董文彥爲威楚路知事文宗天曆間中慶路守敗孤叛引兵攻威楚文彥死之賜謚莊愍官其子時中爲祿豐主

簿

褚君實石樓人泰定中官淮東蕪訪副使汝穎盜起君實守淮安凡五年經數十百戰人比之張巡後城陷爲賊所斃

侯彥直雅州人仕爲忠翊校尉副千戶至元間王虎寇州彥直引兵力戰于名山縣二日兵少力弱爲賊所擒義不屈罵不絕被害

蕭景茂漳州龍溪人順帝至元間漳寇亂景茂率鄉人立

綱目卷之三十三  
三十一  
柵保險堅不可破會旁里有人導之從間道入景茂被  
執賊使拜不屈既欲脅之降景茂大罵賊遂縛之于樹  
剖其肉使自啖嚼且曰我食我肉無若汝賊行將萬段  
狗彘棄不食賊怒絕其舌而死

王伯顏字伯敬濱州霑化人至正九年知福寧州賊自邵  
武間道來逼乃募壯兵五萬與子相馳破之繼賊帥王  
善擁衆壓州西門伯顏與戰被執善欲其仍尹此州伯  
顏叱罵不屈遂挺頸受刃頭斷湧白液如乳暴屍數日  
不變復欲官相相亦罵賊死相之妻潘氏挈二女被獲  
亦罵賊母子俱死御史余闕以狀聞追封太原郡侯命  
立廟祀之



陳陽盈字子謙以父蔭累官侯官縣尉調泉州府稅課司副使至正中草寇攻州知州王伯顏檄陽盈率民兵拒敵奮不顧身陷于賊帥王善習之使降陽盈執大義罵賊遇害事聞勅贈敦武校尉安溪縣尹旌表其門

張桓字彥威藁城人爲西臺監祭御史謝職居雄山縣城陷賊素聞公有活人績置公上座脅之使受僞官公唾罵之遂縛公妻奴九人至前先殺妾次殺子女及妻每殺一人則曰御史若降餘可免公罵如初賊怒拽下殺之時至正十一年秋八月賊語曰張御史真鐵漢

星吉順天河西人爲江南行臺御史大夫至正十一年妖賊徐真一等起汝顏吉督兵討之屢有戰功後以糧盡

士疲被虜不食九日而死賊義之葬斬之鳳凰山下御  
史夔夔請褒其義贈上柱國追封咸寧王謚忠肅

柴肅襄陽總管至正間竹山賊寇襄陽肅等死之

秦不華爲台州路達魯花赤至正中死事追贈江浙平章  
謚忠介立廟台州賜額崇節

葉景仁字天德松溪人至正十二年由政和尉陞蒲城尹  
奉省檄討政和西里寨寇勝之後深入以援不繼爲賊  
所執斷其右膊大罵而死

劉天祐清江人紅巾寇起天祐結好義者謀誅之後爲賊  
所執罵不絕口而死

脫脫同知萍鄉州事至正壬辰斬黃紅巾寇起脫脫集義

兵拒戰死之

傲列箠回鶻人至正間紅巾亂藩臣檄掌東門之管城管  
城陷列箠投井死妻妾子女死者十有一人

汪澤民婺源人致仕禮部尚書居宣州至正十二年斬黃  
紅巾彭黨祖搆亂其餘孽自徽寇宣城宣城陷澤民被  
執不屈死之贈資善大夫江浙等處行中書省左丞上  
護軍追封譙國郡公謚文節

江日新歙人至正十二年斬黃兵陷郡日新與其弟舉兵  
皆死之各贈以官

伯顏不花的斤字蒼崖畏吾兒氏至正中以江東道廉訪  
副使與陳友諒賊黨戰于信州晝夜不息者踰旬城陷

不花的斤自刎其部將蔡誠蔣廣皆不屈死有小民陳受多膂力不花的斤募爲義兵亦痛罵不屈賊焚殺之不花的斤賜謚桓敏

樊執敬字時中鄆城人至正十二年授江浙行省參知政事賊犯餘杭力戰無援賊呼執敬降執敬怒斥之奮刀斫賊因中鎗而墮從僕馳救之亦死贈官賜謚

程擇婺源人爲武昌路學正以平徭蠻有功陞本路教授至正十二年紅巾兵起以府檄起義兵固守城陷死之林夢正字古泉天台人爲溧陽儒學教授賊衆寇溧陽獲其魁張某夢正問曰爾何人應曰我父爲軍千戶紅巾入境逼我父爲帥父以年老令我代夢正痛罵之曰爾

之父祖世爲國家臣子而爾忍爲盜耶旣而賊勢復盛  
竟奪張去下令曰有生得林教授者賞夢正匿他處搜  
得賊曰前日罵我者非爾耶夢正曰然賊曰降我則俾  
爾爲元帥夢正曰爾盜也我何爲降再三終不屈縛于  
樹下解衣冠而殺之

潮海札刺台氏爲靖安縣達魯花赤至正十二年斬黃賊  
起爲所執殺于富州子民安圖襲父職爲本縣達魯花  
赤迎戰力竭賊執而剛之時縣尹黃紹縣中進士胡斗  
元並罵賊而死

聶炳字蘊夫江夏人至正十二年知荆門州纔半歲而淮  
漢賊起陷荆門炳出募兵復之已而斬黃安陸之賊復

來攻晝夜血戰援絕城陷被執炳極口罵不絕賊以刀  
抉其齒盡乃斷左臂而支解之未幾賊陷潛江縣達魯  
花赤明安達爾亦死之

桂完澤永嘉人爲平江管軍鎮撫與妻弟金德同爲賊所  
執縛于樹臨以白刃脅之降金德意未決完澤呼曰金  
舅男子漢卽死不可聽賊德曰此言最是因大罵賊怒  
剖二人腹而死

丑閻字時中蒙古氏人至正十二年知安陸州斬賊魯法  
興犯安陸閻拒戰乘勝追之而賊自他門入城中火起  
軍民潰亂閻乃歸服朝服坐公堂賊脅以白刃使下拜  
不屈且怒罵賊酋不忍害明日又逼其從亂閻復叱之

賊以刀斫左臂脅斷而死其妻侯氏亦自縊死贈丑間河南行省叅知政事侯氏寧夏郡夫人表曰雙節

郭庸字允中蒙古氏監察御史累轉中書省叅政兼留守京師事城破大將召至衆叱之拜庸曰人各爲主死自吾分何拜之有遂遇害

梅實宣城人集慶路總管府照磨至正間大兵圍集慶乏援乃謂友李端曰事急矣當以死殉國城陷闔門皆死馮三湖廣省公使也素不知書湖廣爲寇陷皂隸輩悉起爲盜拉三以從三辭曰賊名惡我勿爲賊賊怒將殺之三遂唾罵賊乃縛諸十字木昇之以行而刳其肉三益罵不止抵江上斷其喉委去妻隨三號泣俯拾封肉納

布裙中俟賊遠收血骸脫衣裹之大泣投江死

劉濬字濟川興州人至正十三年爲連江縣寧善鄉巡檢  
與江西賊帥王善慶戰屢勝後中箭墮馬與仲子健俱  
被執濬戟手大罵賊縛濬階下先斷手一指罵益篤再  
斫一指亦如之指且盡斫兩腕坎及兩足濬色不少變  
罵猶不絕遂割其喉舌而死健亦以死拒賊義之縱使  
歛父屍後結死士報仇手斬殺父者張破四并擒善及  
寇首陳伯祥以獻磔之贈濬福建行省檢校官授健古  
田縣尹官爲濬立祠致祭

朶里不花字端甫蒙古人至正中拜江西行省叅知政事  
爲賊金榮所殺罵不絕口妻卜顏氏妾高麗氏皆遇害



野峻台世延子也至正中以四川行省叅政爲賊所害贈

官賜諡

陳君用字子才延平人至正中以權知副都元帥與紅巾賊戰于江中鎗而死贈官賜諡

李羅帖木兒字國賓高昌人至正中爲襄陽路達魯花赤與賊戰被重創屢其姪馬哈失力使去曰吾以死報國汝無留此馬哈失力泣曰死生從叔父旣而被賊執賊請同爲逆字羅帖木兒怒罵之遂遇害馬哈失力亦死彭庭堅字允誠瑞安人至正中以功陞同知福建道宣慰使司都元帥鎮邵武屢平賊有功以麾下萬戶岳煥縱卒爲暴欲繩以法岳乘不備詐爲賊兵突入衆皆潰庭

堅獨留不去遇害立祠祀之旁邑亦立祠封忠愍侯

陶起祖銅陵人元末兵起嘗募集義兵官至同知後爲趙軍所執伏義而死

鄧可賢乳源人至正中郴寇圍乳源甚急可賢率峇民并其子弟死守凡兩月糧盡奮身出戰被執與弟七人皆死峇民無一人降者

魏中立字伯時濟南人至正間遷饒州路總管徐壽輝攻饒中立被執以紅衣被其體中立叱之鬚髯盡張賊執歸斬水欲屈其從中立大罵不絕而死

湯自愿餘千人至正間斬賊項普陷饒被執不屈死省憲聞于朝命致祭

李棠卿鄱陽人仕無錫倉使張士誠入無錫被執誘以仕  
不屈死之贈樂平州判官

劉耕孫字存吾至正十五年官寧國路推官長鎗賊瑣南  
班等攻城時救兵遠來方疲而城恃有援不爲備賊乃  
夜四鼓緣堞而上賊遂陷耕孫力戰遇害弟陶孫以常  
寧州儒學正死于常寧子碩以江夏縣魯湖大使起義  
兵援茶陵亦死之

李齊字公平廣平人爲高郵知府至正初張士誠復攻陷  
高郵齊被執不屈遇害贈翰林學士追封曹南郡公謚

忠烈

盛昭字克明歸德人由儒學官累遷淮南行省照磨遣人

高郵論張士誠士誠不聽拘諸丹中既而官軍逼高郵  
士誠授昭以兵使拒官軍昭叱曰吾奉命招諭汝之拘  
留詔使罪不容辭又欲吾從汝爲賊耶罵不絕口賊怒  
先剗其臂肉而後磔之

熊義山安鄉人累官至萬戶至正間倪文俊兵至執縣尹  
張惟和義山保障黃山一縣獲安越二年文俊襲執之  
逼使速降義山罵不絕口文俊大怒剖其腹而死

王翕宣城管軍百戶至正十五年長鎗叛帥瑣南班等攻  
郡城將陷翕呼弟曰我受國恩遇難當死顧老母在汝  
等宜出避語訖卽殺妻子焚其居自刎而死

朵兒只班爲中興元帥至正十五年張士誠將倪文俊復

陷中興只班死之

鄭玉字子美歙縣人至正十七年大明兵入徽州守將要致之玉曰吾不得慷慨殺身以勵風俗猶當從容就死以全節義遂夫婦同縊而死

張文貴宣城百戶至正十七年天兵下寧國路守將出降文貴劉死妻妾亦自殺

釋家訥爲膠萊守臣至正十七年劉福通遣毛貴攻膠萊州訥死之

王士元字堯佐恩州人至正十七年知磁州賊至州兵悉散士元安坐堂上顧其子致微使避賊子不忍去賊欲縛士元士元奮拳擊賊遂并子害之

金普庵撒里字子仁高昌人至正中以功拜江西行省泰  
政分省于贛陳友諒來攻城陷自劉謚曰傲哀哈海赤  
守贛尤有功城陷之日謂賊曰不降者我爾無殺百姓  
遂見殺

僧住守婺州至正十八年 大明取婺州住及浙東廉訪

使楊惠死之

余闕至正間爲淮安宣慰副使分治安慶屹然爲江淮保  
障陳友諒攻城闕以孤軍血戰自刎墮清水塘中妻子  
皆赴井死追贈國公謚忠宣

余闕合肥人元至順中累官浙東廉訪司僉事分守安慶  
陳友諒陷安慶闕力戰死之妻耶律氏及子德生女福

童皆赴井死同時死者故守臣韓建一家皆被害事聞  
贈闕淮南行省平章政事謚文忠 本朝謚文宣 命  
有司立祠祀之

帖木補化蒙古氏也至正進士遷桐城縣達魯花赤時縣  
已陷敵補化乃就郡中招集其避地之民諭告切至民  
樂効勞守帥余闕擢爲都事城陷與闕同死懷寧尹陳  
道夫亦闕所辟同闕死

張昇建陽人官至江西儒學提舉至正十八年陳友諒據  
豫章追取諸司印昇乃投其印于井不食而死

劉以忠字恕夫湯陰人至正十八年劉福通侵河朔以忠  
避地林縣鹿嶺山群盜襲之請以忠爲主擁坐盤石衆

卒邏拜于前以忠曰我書生也不能爲國討賊反附之乎遂以頭觸石血流滿面賊度其志終不改刺殺之

于大本字德中密州人爲信州總管被賊執僞主釋其縛畀僞印一紐且命以官大本投印于地痛詈之遂遇害

普顏不花字希古蒙古氏至正十八年經畧江南至建寧陳友諒遣將鄧克明來寇而諸將皆遁不花誓與城同存亡卒大敗賊後爲山東宣慰使大明兵壓境城陷

不花及總管胡濬知院張俊俱死之時普顏不花二弟之妻各抱幻子及婢妾溺舍南井死不花妻阿魯真欲下而井填咽不可容乃抱子投舍北井其女及妾女孫女皆隨溺焉時有申榮者平章山東行省守東昌告父



忠孝不能兩全遂自經

董搏霄字孟起磁州人官山東宣慰使都元帥有疾其功者諸子總兵太尉紐的該令搏霄從上蘭溪同征益都搏霄曰我去濟南必失請以弟昂霄代領其衆朝廷從之搏霄遂率兵北行至南皮縣魏家庄營壘猶未完而毛貴兵至諸將謂搏霄曰賊至當何如霄曰以死報國因授劔督兵以戰而賊兵突至執搏霄殺之是日濟南陷昂霄亦死事聞追封搏霄魏國公謚忠定昂霄隴西郡侯賜謚忠毅

伯顏前江西廉訪僉事至正十八年伯顏謀起兵討賊不克而死事聞謚文節

彭敬叔爲河北僉憲致仕歸道遇兵亂執之使拜不屈死  
之贈兵部尚書隴西侯

喬彞字仲常晉寧人至正十八年賊襲晉寧城陷彞整衣  
冠聚妻子坐大井上令妻子婢循次投井而已隨之贈  
臨汾縣尹謚純潔時有張巖起字傳霖汾州人以國子  
助教與妻赴井死王佐字元輔晉寧人教授里巷詬賊  
不輟而死吳德新字止善建昌人工醫性寧夏爲賊所  
執善不從賊乃縛其兩手加白刃頸上迫其畏屈德新  
罵不已乃曳之井上陽欲擠之而德新卽自投井中仰  
罵賊賊射矢貫其頂罵益力賊以長鎗刺之然亦壯其  
志憐其死曰此真丈夫也以土埋井而去

王英字邦傑益都人性剛果有大節以平寇功拜懷遠大將軍至正間毛貴陷益都英曰吾老不能報天子尚忍食異姓之粟以求生乎遂餓而死

張名德爲般陽總管至正間毛貴攻般陽名德死節贈河南行省左丞謚忠襄

張輔爲陵川尹至正間山東寇亂突入陵川逼輔使降輔抗節不屈具公服坐廳事爲賊所害

張俊山東行樞密院知院大明兵攻益都悉力拒守城陷携妻子投井死

張士謙樂安人知婺源州事敵兵至踰五十餘日城陷被執先戮其妻仍加刃于頸以脅之士謙曰吾爲國死忠

豈畏死耶至死罵詈不絕追封清河郡伯

張祖信爲山東臺幕至正間毛貴入山東祖信被執不屈而死贈河南省員外郎

脫歡簽書樞密院監膠州至正間毛貴陷膠州脫歡力戰死之

神保北庭人至正間爲林州達魯花赤會劉福通兵陷林州神保與民避守蟻尖寨攻急神保懷其所授白麻投崖而死

鄧椿吉水人爲臨江府吏僞漢陷臨江率廬陵義士千百偕萬夫長楊獻與賊大戰三月兵潰投江死

蕭生吉水人爲建州儒學正用辟爲叅謀僞漢陷廬陵叅

政金子仁遁去蕭生赴井死

呂震爲懿州總管至正十九年關先生等兵陷遼陽震死  
之贈河南左丞東平公

張正蒙暨妻韓氏至正十九年紹興兵變夫婦俱縊死女  
也奴年十七亦投崖而死

姜碩樂安人由相府掾累官禮部員外郎至正二十年奉  
詔招安陳友諒等賊不從碩大罵遂遇害事聞詔嘉其  
不徑不竄以偷生惟忠惟孝之在念贈禮部侍郎謚忠  
烈

劉玄謨爲弋陽知州至正二十一年寇兵逼州玄謨力拒  
十九日衆皆欲其降大罵曰吾雖死當殺此賊援兵不

至城陷罵賊而死

顏瑜字德潤曲阜人顏子五十七代孫爲鄒及曲陽兩縣教諭至正間田豐起山東瑜携家走鄆城道遇賊爲所執使見主帥瑜罵曰賊何主帥使之寫旗大詬曰我孰可斷豈能寫旗從逆賊以鎗刺之而死妻子皆遇害

燮理翰爲雲南儒學提舉至正二十三年明玉珍寇雲南城陷理翰死之

朶耳爲宣政院使至正二十三年大明兵取福州朶耳死之

齊郁博興人爲山東西道宣慰司僉事至正中大明兵取益都齊郁死之贈汝南伯

陳元善龍溪人世以儒名家至正二十七年海壖逃兵作亂渠魁薛陽以元善素行孚于鄉里欲先脅之以爲民望元善罵曰吾所畏者義不畏者死汝賊豈能久生耶與其妻郭氏及三子皆遇害

楊居仁爲開化尹饒兵陷治仗義不屈罵賊而死

迭里彌實字子初回回人初爲漳州路達魯花赤 大明

兵下福州興化泉州皆納款迭里彌實仰天嘆曰有死而已及聞招諭使者至乃具公服北面再拜引斧斫其印文又大書手版曰大元臣子卽端坐拔所佩刀刺喉中以死旣死而手猶執刀按膝儼然如生時有獲獨步丁者回回人官僉廣東廉訪使有呂復者爲江西行省

左右司都事皆間居寓福州而復以行省命攝長樂縣尹福州既下二人皆死獲獨步丁兄曰穆魯丁官建康曰海魯丁官信州先是亦皆死國難云

栢帖穆爾字君壽蒙古人累遷福建行省郎中 大明兵至福州召引妻妾坐樓上謂曰丈夫死國婦人死夫義也今城且陷吾必死若等能吾從乎皆應曰有死而已縊而死者六人有十歲女度其不能自死給之拜卽挈囊米壓之死僅匿三歲兒以全宗祀迨兵入城卽舉燈自燃死

陳端孫字伯都登武舉首選出鎮福清時陳友定勒兵侵州境端孫率衆拒之中流矢墜馬被執友定脅之使從



端孫憤罵曰我家三世事元今從汝反耶友定怒殺之  
其妻孫氏抱幼女投井死

卜顏帖木兒爲知樞密事至正二十八年 大明兵至通  
州帖木兒力戰死之八月克燕京淮王帖木兒不華丞  
相慶童左丞丁敬可大都路總管郭允中皆死之

黃復圭安仁人至正兵起圭陷賊庭爲詩寫志賊怒將剖  
其腹圭曰腹可剖赤心不可剖遂死之

鐵木兒不花以副都元帥鎮婺源時所在寇亂戰無虛日  
戊戌春敵兵東下夫人披甲突陣而前謂元帥曰事至  
此有死無二督賊益力夫婦俱死

高文鼎爲廣東元帥至正間三山寇攻廣城文鼎力拒幾

一年援兵不至城陷遂自刎一家皆死

卜里牙敦北庭人至正中爲山南廉訪使寇犯中興與戰被執不屈而死明日中興判官上都復與戰而東門失守倉皇反關力屈被執使降上都大罵賊怒劓其腹剖其肉而死

塔不台字彥暉不知何所人至正中爲襄陽錄事同達魯花赤餉魏王軍于汝亳俱爲賊執魏王拜乞活塔不台以足蹴曰猶欲活乎賊屈其拜塔不台拒而詬之且與縛者角遂支解

韓因字可宗汴梁人至正中應詔授唐州判官招群盜降賊黨止因于外納詔不讀詰問再三因荅以思宥寬大

禍福所係甚切不聽乃縱因歸報因出乘馬周賊屯大  
言曰汝輩好百姓何不出降歸田而甘從逆賊賊渠追  
因寸割之

卞琛大名人至正中以國子生丁母憂治嚴于家鄰郡盜  
起來標掠琛與從子小十等協謀統丁壯擊賊勢不敵  
爲賊所執罵賊死之

趙璉字伯器潁川人宏偉之孫也至正中淮南江北行省  
叅知政事爲張士誠所執瞑目大罵而死弟璉字德仲  
仕至台州路總管至正二十七年方國瑛以舟挾璉至  
黃巖璉潛登白龍輿舍于民家絕粒不食七日而死

孫搗字士謙曹州人至正初進士授濟寧路錄事張士誠

以高郵叛使搗副馬兒招降士誠拘之肆其殘虐搗  
不恤也後謀復高郵事泄罵聲不絕竟爲所害追封南  
郡公謚忠烈厚恤其家

布景龍新都人舉進士授益涼州同知時李頗驢來寇舉  
義兵拒之力戰終日矢盡而死

石普字元周徐州人至正中以樞密院都事從長官守淮  
安欲取高郵城而忌嫉者多不得盡行其志遂爲賊鎗  
所中猶手握鎗斫賊賊攢鎗以刺與從者皆力戰死之  
周鏜字以聲瀏陽州人至正中爲四川行省儒學提舉便  
道還家無何盜至欲推鏜爲主鏜瞠目厲聲大罵賊乃  
殺之時同縣有謝一魯字至道嘗舉進士爲石林書院

山長賊陷潭州爲所縛罵賊甚厲舉家咸遇害

姜天祐吉水人至正間盜起與賊力戰賊勢大盛竟死于賊雖死罵不絕口

李鉉字伯昇衛縣人至正間兄鈞字伯衡者累功至懷遠大將軍郢復上萬戶府副萬戶討寨寇于清流而歿鉉襲職守延平與寨寇戰于政和泗州橋弗克遂死之事聞追贈鎮國上將軍江東道都元帥護軍隴西郡侯

樊復字明仲進賢人至正間寇攻北山與弟文仲姪用行死之贈明仲進賢尹文仲臨川丞用行崇仁簿

雷燦鄉貢進士至正中閩中亂燦起兵助王師死之贈汀州路上杭縣主簿

納速刺丁字士瞻大名人爲淮東憲訪司書吏至正間李璉入據興化納速刺丁力戰不勝與其三子寶童等皆死之贈淮東元帥府經歷

陳無咎永豐人值兵亂叛寇強之從無咎曰相從可矣乞與我紙筆乃大書一詩與寇寇怒拔其舌剗其腹含糊罵不絕口而死

韓心淵武安人以文學徵入國子監至正間任衡水縣尹以德化民蝗不入境調真定縣尹會掃地王作亂心淵與子拒守城陷父子俱死之

張遠永豐人元季盜起沔陽所過殺掠遠與友羅惟遠謀督郡兵禦寇寇知其謀被執俱不屈死之

許則祖樂平人至正間亂兵四起則祖倡義兵恢復德興縣後屢戰勝一日追賊馬陷泥中遇害謚忠顯

楊本巖廬陵人白鹿書院山長元季兵起至吉本巖率民兵保障遷廬陵主簿往捕東固寇盜乘勢深入本巖死之子節聞父死力與寇敵亦死

閔本字宗先河內人始爲御史臺掾五轉爲吏部尚書移刑工二部皆以能稱嘗上章乞謝事不允詔授集賢侍講學士大明兵薄京城乃北向再拜大書其職銜姓名于壁與妻程氏及二女皆縊死

邢飛翰霍州人以兩淮鹽運司同知致仕元末兵亂被執不屈而死追封工部尚書謚忠義

馮文舉什邡人舉進士爲雲南儒學正提舉 大明兵攻雲南文舉謂妻馬氏曰我元進士蒙厚恩今軍至有死無二汝光州馬中丞子孫其從之乎馬氏曰官人旣去生亦何益遂皆自縊

胡濬爲益都路總管 大明兵攻其城自縊死時山東宣慰副使于德文僉山東宣慰司事齊都皆死之

拜住字聞善康里人爲太子司經 大明兵至赴井而死王遜志歷官監察御史出爲江西廉訪副使召簽太常禮院元末京城不守公卿爭出降遜志獨家居衣冠而坐其友王翼來告曰 新朝寬大盍出詣官自言狀遜志斥之曰君旣自不忠又誘人爲不義耶卽日投井死



趙弘毅字仁卿晉州人爲國史編脩官 大明兵入城弘毅嘆曰我今但有一死報國耳乃與妻解氏皆自縊其子恭爲中書管勾亦與妻訣曰吾父母俱死尚敢愛生乎遂公服北面再拜縊死

黃得字殿士金谿人仕至翰林待制燕國子編脩京城旣破得赴井死

孔會心新淦人元末守臣不屈赴水死贈叅軍都錄事

陳祖仁字子山汴人至正初進士第一官翰林學士除叅知政事及順帝北遁祖仁死焉時年五十有五

朱春元末爲三原尹洪武二年 天兵克城春與妻俱投崖死

王翰字用文廬州人任福建江西行省郎中後表授潮州  
總管元亡屏居永福山中 洪武中或上書薦之 命  
下乃嘆曰女可更適哉遂爲詩別其友卽自引決

吳訥休寧人至正末以召授建德路判官兼民兵萬戶與  
元帥李克魯攻城復之丁酉 天兵臨郡訥戰敗不屈  
自刎而死

潘炎字允大扶溝人舉進士再遷襄城縣尹免官歸賊將  
劉太保陷扶溝遣人辟之爲學士炎罵曰我豈從賊者  
耶以首觸庭柱而死

高傳字起巖謙曾孫爲林州團練萬戶赴調遇盜邏卒且  
戰且行盜率大衆突擊傳疋馬挾勁弓射無不中盜懾

不敢前援兵不至盜復合攻誘使降傳厲聲大罵力戰而死

董成夫以軍功授察罕腦兒宣慰使司宣慰使胡寇犯邊沒于王事贈中大夫樞密院副使謚忠烈命配食廟庭羅次炳廬陵秀川人以征連爲寇所敗被擒備極慘酷竟不屈而死贈番禺縣主簿

馬哈麻回回人尉政和夷兵入寇馬哈麻率鄉兵拒戰弗利被執瞑目罵賊賊怒剖其腹腸出委地猶罵不絕口昔里吉思爲鳳翔兵馬判官死國事贈輔國上將軍恒州刺史廟號褒忠

張鳳儀紹州路經歷領孤軍追賊兵潰不屈死于萬里覆

續文獻通考

卷之二十五

五

四百七十一

賊首張韶卿剖胃劈肝生啖之尋補父官亦死于贛寇  
李宗可有勇略善禦余闕嘗以兄女妻之以州判官權義  
兵萬戶統新軍守水砦前後多戰功城破人勸之降怒  
曰元帥平日遇我厚我負元帥異日何以見于地下驅  
其家屬盡殺之據胡床縱飲至醉自刎

楊樸字文素河南人早以文學得推擇爲吏官至滁州全  
椒縣尹盜入城樸度必死盡殺其妻女朝服坐堂上盜  
欲降之樸指妻女示曰我已戕吾屬政欲死官守耳乃  
連唾之賊勢之倒懸樹上而割其肉至盡猶大罵不絕  
毛鐸南昌人署爲富州學正時土賊李明道據州治脅爲  
從事鐸罵不絕遂遇害

祝興可寧州人世業儒與寇吳娘子等戰敗被執罵不輟口而死

堵簡金壇人元末平章慶童領兵復松江簡爲叅謀兵敗爲賊所擒欲留用之不屈而死

喜同河西人調南陽縣達魯花赤賊陷南陽突圍而死妻邢氏聞同死帥家僮數人出走遇賊奪刀斫之且罵且前亦見殺一家死者二十餘人

陳新泰和人以新淦州判居家監州達正道聞其賢辟守州之東境寇至援少食盡被執抗節不屈死之

李蘆字子敬安福人知信豐時兵起父子俱死于賊邑人立雙節祠祀之

朴賽因不花字德中合台人爲中書政事兵至被執請速  
死殺之

張庸字存中温州人爲刑部尚書仍領房山團結兵至寨  
民李世傑執庸出降不屈而死

丁好禮字敬可真定蠡州人官中書平章政事留守京師  
天兵至不肯謁大將軍昇至齊化門抗辭不屈而死  
牛富霍丘人勇而知義爲侍衛馬軍司統制戍襄陽移守  
樊城累戰不少血城破率死士百人巷戰遇民居燒絕  
街道以頭觸柱赴火死贈靜江軍節度謚忠烈裨將王  
福曰將軍死國事豈宜獨生亦赴火死

李黼隸州人父守中爲元工部尚書泰定中以明經魁累

官宣文閣監書博士兼經筵官數與勸講至正中江南  
寇起出守江州路總管捍賊有功詔爲行省叅政賊大  
至城陷巷戰叱曰殺我無殺百姓與從子兼昭皆罵賊  
而死謚忠文兄冕居穎亦死于賊

曹彥可亳州人至正間妖賊起里中皆不知書者群趨彥  
可家以刀斧逼之寫旗彥可唾曰我儒者知有君父寧  
死耳豈爲汝寫旗者耶遂遇害事聞謚節愍

趙觀光鄞人以博士弟子員得推擇試吏奉化州尋遷昌  
國至正十年黃岩寇起昌國孤縣觀光招諭有方不擾  
事集明年寇衆數倍力不支遂死焉

郭嘉開州濮陽人祖昂父惠俱以戰功顯嘉有大志舉叅

定進士累官禮部員外郎至正十八年遼陽騷動特授  
廣寧路總管既至賊勢日張孤城無援賊遣使脅之降  
嘉殺其使開門督戰力竭死之詔謚忠烈

周宏遷安人元時爲無極寧昌昌黎三縣尹在昌黎時程  
思忠作亂宏率其民赴永平城拒守城陷被執宏不屈  
七日不食罵不絕口而死

福壽江南行臺御史大夫 本朝兵圍集慶福壽數督兵  
出戰城破有司皆奔潰或勸之去福壽曰善爲國家重  
臣城有則生城破則死尚安往哉遂遇害

胡善至正間爲松江府學訓導苗賊陷松江欲毀孔廟善  
罵賊遂被害初善聞賊至卽以死節自誓題詩于壁曰



領檄來司教臨危嬰致身

劉溶武進縣尹至正末寇兵陷常州官軍潰散溶獨率民兵戰于葛橋南死之

石株宜孫元副都元帥守處州 本朝護其弟及母以書

招宜孫不至遁入建寧復出與 王師戰敗走死于挑

坑 朝廷嘉其盡忠遣使諭祭州民立祠祀之

俞述祖象山人累官翰林國史院編脩出爲沔陽府推官至正中斬黃賊迫州境述祖以民兵捍禦兵力不支城陷爲賊所執械至僞主徐壽輝所誘使降述祖罵不輟賊怒支解之贈禮部郎中象山縣男

楊乘字文載濱州人負氣博涉經史累官浙省員外郎至

正壬辰杭州陷非罪被黜依青龍章元澤以居丙申松江陷或傳張氏將起乘笑曰吾豈事二姓使果至乘知不免以家事屬章具禮享先祠畢設飲起行後圃中顧西日晴好慨然曰晚節如是足矣處置家事如平日夜分就寢遂自縊遺書言死生如晝夜不足介意且以得全臣節爲快云